



Minggu, 31 Oktober 2021
Ogen: 2 Jesaya 28:16



Ate Sabar



Cara Tuhan nampati megati la tersipati. Ngidah bangsa Israel itokohi bangsa-bangsa si ngkuasai ia, la kal payo akap Dibata. Aminna gia ciga ate Dibata lagu langkah bangsaNa tapi adi kalak si nokohisa labo payo akapNa. IA saja nge atena ngukum bangsaNa, sabap i bas ukumenNa e situhuna lit i je ateNa keleng. Labo kap siangka uga Tuhan e erdahin, lang adi nembah nge atena Israel e me enggo payo adi lit kalak si nggombang-nggombangi ia?

Isampati Tuhan Israel alu namaken sada batu si enteguh i Sion, i bas batu e tertulis, *'kiniteken si enteguh e me kap sabar ate.'* Tuhan ngajuk bangsa Israel tetap sabar nimai Dibata erdahin nampati ia i bas ngalaken kerina musuh-musuhna. Amin enterem kalak si megombang man bana, nokoh, naling-naling, nipu, ras sidebanna. Sabar ate ertina la mis merawa, ikuasaina dirina, teneng ras lit pengarapenna. Nina Jesaya man Israel, Dibata tetap erdahin guna kiniulin kegeluhen bangsa Israel.

Lit nge cara Tuhan si tepat nampati anak-anakna ras kalak si tetap erpengarapen man baNa situhuna labo kemalun. Si rusur jadi persoalen e me la kita sabar nimai Tuhan erdahin. Apaika adi lit kalak si megombang entah nokoh man banta, mis kal ateta kita lebe ngalakensa. Mbiar ka kita adi ikataken kalak talu, entah la pang ngelawan. Nina Franklin, *'kita dapat terlibat dalam kesulitan jika tidak melatih diri menantikan Tuhan.'* Tapi kalak si tek man Tuhan, itimaina alu ate sabar Tuhan erdahin. Adi tek kita maka sura-sura Tuhan uga pa pe si mehulina man banta, janah si ikutken sura-suraNa e, maka Tuhan me dungna si engkuasai pusuh ras perukurenta, engkuasai jabunta, engkuasai pendahinta, engkuasai perekonominta ras engkuasai kerinana kegeluhenta.